

**आकाशवाणी**

1. प्रधानमंत्री नरेन्द्र मोदी होरें असम दे सिलचर थमां 23 जहार 550 करोड़ रुपए दी बक्ख-बक्ख विकास परियोजनाएं गी शुरु करवाया- उनें आखेआ उत्तर पूर्व इसलै भारत दी Act East Policy दी अगुआई करा'रदा ऐ।
2. प्रधानमंत्री मोदी होरें अज्ज दपैहरी पच्छिम बंगाल दे कोलकाता थमां 18 जहार 680 करोड़ रुपए दी लागत आली विकास परियोजनाएं दा कम्म शुरु करवाया।
3. सरकार नै घरें- अस्पतालें- शिक्षण संस्थानें ते दुई जरूरी सेवाएं आस्तै बगैर कुसा रुकावट दे ईधन आपूर्ति दा भरोसा दोआया- कन्नै गै परचून डीलरें गी भास सरबंधत दिशा-निर्देश नेही मनने पर कड़ी कार्रवाई दी चेतावनी दिती।
4. केन्द्र नै लद्दाख दे कार्यकर्ता सोनम वांगचुक गी हिरासत च रखने दे फैसले गी लैता वापिस- वांगचुक गी राष्ट्री सुरक्षा कन्नू हेठ हिरासत च लैता गया हा।
5. इराक दी राजधानी बघदाद च इक मिसाइल नै अमरीकी दूतावास गी निशाना बनाया- दक्खन लेबनान च इक सेहत इदारे पर इजरायली हमले च 12 सेहत कर्मी मारे गे।
6. महिलायें दे हॉकी च FIH हॉकी विश्व कप Qualifier 2026 दे फाईनल मुकाबले च भारत- इंग्लैंड होगंन आमने-सामने। एह मैच शामी हैदराबाद च खेडेया जाग।

<><><><><><>

**PM -Dev. Projects**

प्रधानमंत्री नरेन्द्र मोदी होरें असम दे सिलचर थमां 23 जहार 550 करोड़ रुपए दी बक्ख-बक्ख विकास परियोजनाएं गी शुरु कराया। मोदी होरें उत्तर-पूर्व च अपने-आप च पहले 22 जहार 864 करोड़ रुपए दे पुज्ज नियंत्रण आले सिलचर- शिलांग बश्कार-मेघालय च एक्सप्रेस-वे दे भूमि पूजन च हिस्सा लैता। इक सौ 66 किलोमीटर Four – Lance हरा-भरा तेज रफ्तार आला गलियारा-गुवाहाटी- सिलचर बश्कार दायरे गी 295 किलोमीटर थमां 252 किलोमीटर तोड़ी घटाग ते सफर दा वक्त साइडे 8 घंटे थमां घटिए 5 घंटे रेही जाग। प्रधानमंत्री होरें एन.एच 306 पर इक उच्चे गलियारें दा बी नीह पत्थर रखेया- जेड़ा Capital Point दे कोल ट्रंक रोड थमां सिलचर च रंगीर-खारी Point तोड़ी होग। इस परियोजना दा मकसद सिलचर दी भीड़-भाड़ आली सिडकें पर रश घट्ट करना- कन्नै लग्गदे राज्ये-मिज़ोरम- त्रिपुरा ते मणिपुर कन्नै सम्पर्क सुधारना ते बराक घाटी दे आर्थिक विकास गी रफ्तार देना ऐ। मोदी होरें करीमगंज जिले च पत्थरकंडी

थाहर पर कृषि महाविद्यालय दा नीह पत्थर बी रखेया- जेदी लागत 122 करोड़ रुपए ऐ। इस मौके बोलदे होई प्रधानमंत्री होरें आखेआ- उत्तर पूर्व भारत दी Act India Policy- दी अगुआई करा'रदा ऐ। कांग्रेस दे शासन दौरान बराक घाटी दी अनदिक्खी होई- जेड़ी गै दक्खन-पूर्वी एशिया दे प्रवेश द्वार आला लेखा उभरा'रदी ऐ। बराक घाटी इक बेल्ले महत्वपूर्ण औद्योगिक केन्द्र ही- मगरा कांग्रेस काल दौरान लैते गेदे फैसलें कारण रणनीतिक फायदा नेही लब्या। उ'नें आरोप लाया जे लम्बे चीरे तोड़ी देश ते राज्यें पर शासन करने दे बावजूद- कांग्रेस नै बराक घाटी दे विकास पर कोई ध्यान नैही दिता। मगरा हून Double Engine सरकार बराक घाटी दे विकास बक्खी तेजी कन्नै कम्म करा'रदी ऐ- तांजे ए विकसित क्षेत्र बनी जाए। मोदी होरें आखेआ जे सिलचर -शिलांग तेज रफ्तार गलियारें दे नीह पत्थर रखने कन्नै इक ऐतिहासिक गें पुट्टी गई ऐ। प्रधानमंत्री होरें आखेआ जे उत्तर पूर्व च रेलवे दे ढांचागत विकास आस्तै केन्द्र पूरी चाल्ली प्रतिबद्ध ऐ। मोदी होरें दस्सेया जे उत्तर पूर्व च 2 ज्हार 5 सौ किलोमीटर रेलवे लाइनें दा बिजलीकरण किता गया ऐ ते बराक घाटी च बी रेलवे लाइनें दा बिजलीकरण किता जाग। प्रधानमंत्री होरें आखेआ जे बी.जे.पी. सरकार देश दे नागरिकें दा जीन सौक्खा बनाने आस्तै हर संभव कोशिश करा'रदी ऐ। मोदी होरें जोड़ेया जे सरकार दा मकसद ऐ जे देश दे नागरिकें पर जंग दे असर गी घटाया जाए।

<><><><><><>

### **PM- Kolkata Projects**

प्रधानमंत्री नरेन्द्र मोदी होरें अज्ज कोलकाता च तकरीबन 18 ज्हार 680 करोड़ रुपे दियें केई विकास परियोजनाएं दा उदघाटन कीता ते केइयें दे नीह पत्थर बी रक्खे। इस मौके पर प्रधानमंत्री होरें आखेआ जे इनें नमीं परियोजनाएं दे कन्नै नां छड़ा पच्छिम बंगाल-सगुआं समूलचे पूर्वी खिते दे विकास गी इक नमीं रफ्तार थ्होग। सिड़के सरबंधी ढांचे गी बढ़ावा दिंदे होई प्रधानमंत्री होरें तकरीबन 16 ज्हार 990 करोड़ रुपें दियें 420 किलोमीटर शा लम्मी- राश्ट्री जरनैली सिड़के सरबंधी केई परियोजनाएं लेई नीह पत्थर रक्खे। इनें प्रोजेक्टें च पच्छिम बंगाल ते झारखंड च एन.एच-19 दे किश हिस्सें ते पच्छिम बंगाल च एन.एच-114 बी शामिल हे। मेद ऐ जे इनें परियोजनाएं दे कन्नै सिड़क सुरक्षा च बाददा होग- जातरा दे समें च कमी औग- जाम जनेही स्थिति कोला राहत थ्होग- प्रदूषण घटोग- इलाकाई सम्पर्क च बेहतरी होग ते सैलसफा ते आर्थिक विकास गी बढ़ावा मिलोग।

<><><><><><>

## Fuel Supply

सरकार नै घरे- अस्पतालें- शिक्षा- संस्थानें ते दुई जरूरी सेवाएं गी बगैर कुसा रुकावट दे ईंधन आपूर्ति दा आश्वासन दिता ऐ। घरेलू एल.पी.जी उत्पादन रिफाइनरीज़ च 30 फीसद तोड़ी बदाई दिता गया ऐ। पेट्रोलियम ते कुदरती गैस मंत्रालय दे संयुक्त सचिव-सुजाता शर्मा होरें ए जानकारी पच्छम एशिया च बने दे हालातें पर इक अंतर मंत्रालय प्रैस वार्ता च नमीं दिल्ली च दिती। उ'नें आखेआ कमर्शियल एल.पी.जी सिलेंडर राज्य सरकारें गी उपलब्ध कराए जागंन जेड़े जे प्राथमिकता साहबे उपभोक्ताएं गी अगगे दिते जागंन। उ'नें जानकारी दिती जे घरेलू PNG ते CNG गी बगैर कुसा रुकावट दे उपलब्ध कराया जाग। सारे परचून डीलरें गी हिदायत दिती गई ऐ जे ईंधन दिंदे बेल्ले सख्ती कन्नै निर्देशें दी पालमा करन ते कुसा चाली दी अवहेलना पर सख्त कारवाई किती जाग। उ'नें घोषणा कीती जे सारे राज्यें ते केन्द्र शासित प्रदेशें गी 48 जहार किलोलीटर बादू मिट्टी दा तेल दिता जाग ते अर्ज किती गई ऐ जे जिला स्तर पर थहारें गी चुनियै सेही तरीके मिट्टी दा तेल दिता जाए।

<><><><><><>

## Wangchuk Detention Revoked

सरकार नै तुरत प्रभाव कन्नै सोनम वांगचुक गी हिरासत च रखने आला हुकम वापिस लेई लैता ऐ- जेड़े पिछले बरे सितम्बर च राश्ट्री सुरक्षा कन्नू (NSA) तैहत हिरासत च हे। गृह मंत्रालय नै आखेआ ऐ जे सोनम वांगचुक पिछले बरे लेह च कन्नू बवस्था सरबंधत गंभीर हालात बनने दे संदर्भ च हिरासत च लैते गे हे। उ'नें गी NSA दे प्रावधानें हेठ जिला मैजिस्ट्रेट लेह हुंदे आदेश पर हिरासत च लैता गया हा- तांजे हालात स्थिर बने रौहन। गृह मंत्रालय नै आखेआ ऐ सरकार लद्दाख च शांति- स्थिरता ते आपसी विश्वास दा माहौल बनाने आस्तै प्रतिबद्ध ऐ- तांजे हितधारकें कन्नै उपयोगी ते सार्थक गल्लबात कीती जाई सकै।

<><><><><><>

## Dubai Consulate

दुबई च भारत दे कनसुलेट जनरल होरें नियमित भारती वीजा ते ई-वीजा दी मियाद बदाने दी घोषणा कीती ऐ ते पच्छिम एशिया च बने दे हालातें दे चलदे भारत च फसे दे विदेशियें गी समय कोला मता भारत च रुकने पर पेनल्टी यानि Over Stay Penlty गी माफ करी दिता ऐ। इक सोशल मीडिया पोस्ट च कनसुलेट जनरल होरें आखेया- सारे चाली दे विजाज ते ई-वीजास खत्म होआ'रदे न जां जल्द गै खत्म होई जागंन- इस'करी इने'गी इक महीने आस्तै बधाई दिता गया ऐ। ए आखेआ गया ऐ जे 28 फरवरी दे बाद भारत च रुकने आस्तै प्रभावित विदेशियें पर Overstay Penlty नैही लाई जाग। उ'नें आखेआ जे भारत दे बाहर जाने आस्तै परमिट प्रभावित विदेशियें गी निशुल्क दिते जागंन।

<><><><><><>

### HM -Punjab Visit

गृहमंत्री अमित शाह होरें आखेआ ऐ जे अज्ज पंजाब दे लोक आम आदमी पार्टी दे भ्रष्टाचार ते माड़े प्रशासन कोला तंग आई गेदे न। उ'नें आखेआ पंजाब दे लोक विकास-स्थिरता ते ऐसी सरकार चाहंदे न- जेड़ी लोकें दे हित च कम्म करै। उ'नें ए गल्ल मोगा दे ग्रां किली चेहलां च बदलाव रैली गी सम्बोधित करदे होई आक्खी। एदे शा पैहले इक सोशल मीडिया पोस्ट च गृहमंत्री होरें आखेया जे पंजाब हर इक बदलाव चाहंदा ऐ।

<><><><><><>

### US Prez- Iran Ambition

अमरीका दे राष्ट्रपति डोनाल्ड ट्रम्प होरें आखेआ ऐ जे ईरान दा लक्ष्य हा जे ओ पूरे पश्चिमी एशियाई क्षेत्र पर कब्जा करियै इजरायल गी तबाह करै- मगरा दावा किता हा जे ओ योजना हुन खत्म होई गेइयां न। दूथ सोशल पोस्ट च ट्रम्प नै आखेआ ऐ जे ईरान नै जियां आक्खेआ- ए योजना खत्म न। पहले ट्रम्प नै आखेआ हा जे अमरीका दी केन्द्री कमांड नै ईरान दे खर्ग टॉपू पर सैन्य निशाने पर भारी बम्बारी कीती ऐ ते इस ऑप्रेसन च हर सैन्य ठिकाना नश्ट करी दिता गया ऐ। उ'नें आखेआ जे एह हमला उ'दे आदेश पर किता गया ते मन्या गया ऐ जे इस क्षेत्र दे इतिहास च एहग सब्बनें शा बड्डी बम्बारी ही। उ'नें जोड़ेया जे अमरीका नै टॉपू पर तेल सरबंधत थाहरें पर हमला नैही किता।

<><><><><><>

## Prog. Announcement

आकाशवाणी जम्मू दे क्षेत्रीय समाचार एकांश आसेआ औंदी 16 मार्च गी “राश्ट्री टीकाकरण दिवस-2026” दे मौके पर 25एं मिंटें दा इक विशेष कार्यक्रम प्रसारित कीता जाहग- जेहदा विशेषे होग “ टीकाकरण जागरूकता राएं सार्वजनिक सेहत गी निग्गर बनाना”। इस विशेषे कार्यक्रम दा प्रसारण दपैहरी 12 बजे कीता जाहग ते एहदे च स्हाड़े परौहने होडन- जम्मू-कश्मीर सरकारें दे सेहत विभाग दे राज्य टीकाकरण अधिकारी डॉक्टर शाहिद हुसैन- जेहड़े इस चर्चा राएं अपने माहिराना बचार सांझे करडन। इस कार्यक्रम दी मेजबानी साहड़े न्यूज एंकर विजय बजाज करगंन।

<><><><><><>

## Women’s Hockey

महिलायें दे हॉकी च भारत दा मुकाबला इंग्लैंड कन्नै FIH हॉकी विश्व कप क्वालिफाइयर्स 2026 दे फाईनल च होग। ए मैच अज्ज शामी- हैदराबाद- तेलंगाना च जी.एम.सी. बालायोगी हॉकी ग्राउंड च होग। मैच शुरु होने दा समें साइडे 7 ऐ। दवै टीमं बगैर कुसा हार दे फाईनल च पुज्जियां न। सलिमा टेटे होर भारती टीम दी अगुआई करारदियां न। भारत नै कल इटली गी 1-0 कन्नै हराइयै फाईनल च थाहर पक्की कीती ही। भारत दी मनीषा चौहान होरें 40 मिन्टें पर जेत्तू गोल किता हा।

<><><><><><>

## Lebanon –Israel Strike

लेबनान च सेहत इदारे पर इजरायल तरफा हमले च 12 सेहत कर्मि मारे गे न। लोक सेहत मंत्रालय लेबनान ने आखेआ ऐ जे एह हमला बिंट जबिल जिला दे बुर्ज कालाउइयाह दे ग्रां च होआ ते डाक्टरें- दुए सेहत कर्मियें ते नर्सें दी एदे च मौत होई गेई। मंत्रालय नै आखेआ ऐ जे किश घंटे दे अंदर सेहत इदारें पर ए दुआ हमला ऐ। पैहला हमला दक्खनी ग्रां सोउआनेह च होआ- जेदे च 2 सेहत कर्मि मार गे हे।

<><><><><><>

## US Embassy -Baghdad

ईराक दे बघदाद शैहरा च स्थित अमरीकी सफारतखाने पर जंदी रातीं इक मिसाईल हमला होआ। एह हमला ईराक दे ओकड़े इलाकें च होआ ऐ- जित्थे ईराकी सरकार ते बदेशी राजदूती दफतरें दियां ईमारतां न। एह हमला- ईराक दी राजधानी च दंडू ईरानी लड़ाकें दे मारे जाने दे किश गै चिरै परैन्त होआ। इस हमले गी लेइयै बघदाद च अमरीकी सफारतखाने दी तरफा कोई टिप्पणी नैई कीती गई। उआं ईरान दे सरकारी मीडिया मूजब बघदाद च अमरीकी सफारतखाने गी निशाना बनाने लेई इक आत्मघाती ड्रोन दा इस्तेमाल कीता गया ते एहदा मकसद रडार प्रणाली गी तबाह करना हा। ध्यानजोग ऐ जे अमरीका ते ईरान दी लड़ाई च ईराक ऐल्लै इक अखाड़ा जन बनी गेदा ऐ।

<><><><><><>

### **Drone Movement -Samba**

बन्ने आले जिले साम्बा च इक पाकिस्तानी ड्रोन दे बन्ना टप्पियै भारती इलाके च घुसपैठ करने दी घटना दे मगरा सुरक्षाबलें जिले दे केंई अगेत्रे ग्राएं च अज्ज बड्डे स्तरें पर तपाशी अभियान चलाया। आकाशवाणी दे जम्मू संवाददाता दी रिपोर्ट मूजब- जंदी रातीं साम्बा जिले दे रामगढ़ सैक्टर च कंदराल- अबलाल ते बहादुरपुर ग्राएं च किश मिन्टें लेई पाकिस्तानी ड्रोन दी नक्लो-हरकत दिक्खी गई। एहदे तुरत मगरा सुरक्षाबलें पूरे इलाके च निगरानी बधाई दिती ते लौऽ होंदे गै बड्डे स्तरें पर तपाशी अभियान रम्भी दिता गया- तां'जे इस गल्लै गी पक्का कीता जा- जे कुतै दुश्मन देश दे ड्रोन नै भारती इलाके च कोई थेहार जां नशीले पदार्थ ते नैई सुटटे दे- ते जेकर ऐसा ऐ तां उं'दा पता लाइयै उ'नेंगी अपने कब्जे हेठ लैता जाई सकै।

<><><><><><>

### **Cold Water Conf.**

मच्छी पालन मैहकमे दे केन्द्री मंत्री राजीव रंजन सिंह ते लैफ्टिनेंट गवर्नर मनोज सिन्हा होंरें ठंडे पानी आले मच्छी पालन खेतर बारे लोआए गेदे राश्ट्री सम्मेलन दे दरान अज्ज श्रीनगर दे SKICC च नमैश दा दौरा लाया। मुख्मन्त्री उमर अब्दुल्ला ते मच्छी पालन मैहकमे दे केन्द्री राज्यमंत्री प्रोफैसर एस.पी. सिंह बाघेल बी इस मौके पर उत्थे मजूद हे। अपने दौरें दरान केन्द्री मंत्री होंरें प्रदर्शनी च हिस्सा लै'करदे उद्यमियें ते

साईसदानें कन्नै गल्लबात कीती। सम्मेलन गी सम्बोधित करदे होई केन्द्री मंत्री राजीव रंजन सिंह होरें मजबूत नीतियें ते ढांचागत मदाद दे राहें जम्मू-कश्मीर च मच्छी पालन खेतर गी तगड़ा बनाने दी भारत सरकार दी मजबूत वचनबद्धता गी फही पक्का कीता।

<><><><><><>

### CM Conf.

मुख्यमंत्री उमर अब्दुल्ला होरें जम्मू-कश्मीर च कुदरती संसाधनें दी राक्खी-हिफाजत करदे होई ठंडे पानी आले मच्छी-पालन खेतर गी तगड़ा बनाने लेई साईसी शोध-आधुनिक तकनीकें ते टिकाऊ तौर-तरीकें गी अपनाने दी जरूरतें पर जोर पाया। श्रीनगर दे शेर-कश्मीर अंतराष्ट्री कन्वेंशन सेंटर च ठंडे पानी आले मच्छी पालन खेतर बारे लोआए गेदे राश्ट्री स्तरें दे सम्मेलन गी सम्बोधित करदे होई मुख्यमंत्री होरें आखेआ जे युनिवर्सिटियें ते शोध संस्थानें गी ऐसी नमीं तकनीकां विकसित करने च मती महत्वपूर्ण भूमिका निभानी लोड़चदी ऐ- जेहड़ियां इस खेतर दे विस्तार ते एदे च नमीं जान भरने च मददगार होन। उ'नें आखेआ जे सरकार गी इस गल्लै गी जकीनी बनाना लोड़चदा ऐ जे मच्छी पालन खेतर दा टिकाऊ विकास होऐ तां'जे पानी आले मच्छी पालन तंत्र दा संरक्षण बरोबर होंदा रवै।

<><><><><><>

### Weather

मौसम विभाग नै आखेआ ऐ जे जम्मू-कश्मीर च औंदी 20 मार्च धोड़ी मौसम दी स्थिति च मता उतार-चढ़ाव दिक्खने गी लब्बग। इस अवधि दरान पदरे इलाके च रूकी-रूकियें बरखा ते उच्चिएं धारें प बर्फबारी होग। स्हाढ़े संवाददाता नै जानकारी दिती ऐ जे अज्ज ते कल बी मौसम आमतौरा पर खुशक रौहग पर कल संझा'लै अंधी-झक्खड़ झुलने ते एहदे मगरा कल रातीं ते 16 मार्च गी बड्डलै किश थाहें पर हल्की थमां दरम्याने दर्जे दी बरखा बरने ते बर्फबारी होने दे असार न। एहदे परेंत औंदी 17 थमां 20 मार्च धोड़ी मौसम बदलोखड़ा बने दा रौहग ते इस दरान बरखा यां बर्फबारी दे असार बने दे रौहडन।

<><><><><><>